

La dance , la chaffe , & les bois , Nous rendent exemptes des lois Et des mifères dont l'Amour Afflige les cœurs de la Cour .

Et c'est plustost auec cet art Qu'auec la pointe de ce dard Que cette trouppe se desfant Des traits de ce cruel Enfant.

Car en changeant tousiours de lieu Nous empeschons si bien ce Dieu, Qu'il ne peut s'asseurer des coups Qu'il pense tirer contre nous. Ainsi nous defendans de luy, Et passans nos jours sans ennuy, Nous essayons de luy rauir La gloire de nous asseruir.

Il est bien vray qu'en nous sauuant Il nous va tousiours poursuyuant, Et nous poursuit en tant de lieux, Qu'en sin il entre dans nos yeux.

Mais encor' qu'on puisse penser Qu'alors ils nous doinent offencer, Pourtant nous n'auons point de peur Qu'il nous puisse enflamer le cœur.

Car la neige de nostre sein Empesche sibien son dessein, Qu'alors qu'il nous pense enstamer Son feu ne se peut allumer.

B iij

